

বাংলাদেশ



গেজেট

অতিরিক্ত সংখ্যা
কর্তৃপক্ষ কর্তৃক প্রকাশিত

রবিবার, অক্টোবর ২৮, ২০১৮

গণপ্রজাতন্ত্রী বাংলাদেশ সরকার
অর্থ মন্ত্রণালয়
আর্থিক প্রতিষ্ঠান বিভাগ
প্রজ্ঞাপন

তারিখ: ০৮ কার্তিক, ১৪২৫ বঙ্গাব্দ/২৩ অক্টোবর, ২০১৮ খ্রিস্টাব্দ

এস. আর. ও. নং ৩১২-আইন/২০১৮।—বীমা আইন, ২০১০ (২০১০ সালের ১৩ নং আইন) এর ধারা ১৪৬, ধারা ১২৭ এর সহিত পঠিব্য, এ প্রদত্ত ক্ষমতাবলে সরকার এতদ্বারা নিম্নরূপ বিধিমালা প্রণয়ন করিল, যথা:—

১। শিরোনাম ও প্রবর্তন।—(১) এই বিধিমালা নন-লাইফ বীমা জরিপকারী (লাইসেন্সিং) বিধিমালা, ২০১৮ নামে অভিহিত হইবে।

(২) ইহা অবিলম্বে কার্যকর হইবে।

২। সংজ্ঞা।—(১) বিষয় বা প্রসঙ্গের পরিপন্থি কোনো কিছু না থাকিলে, এই বিধিমালায়,—

(১) “আইন” অর্থ বীমা আইন, ২০১০ (২০১০ সালের ১৩ নং আইন);

(২) “কর্তৃপক্ষ” অর্থ বীমা উন্নয়ন ও নিয়ন্ত্রণ কর্তৃপক্ষ আইন, ২০১০ এর ধারা ৩ এর উপ-ধারা (১) এর অধীন প্রতিষ্ঠিত বীমা উন্নয়ন ও নিয়ন্ত্রণ কর্তৃপক্ষ;

(৩) “কর্তৃপক্ষ আইন” অর্থ বীমা উন্নয়ন ও নিয়ন্ত্রণ কর্তৃপক্ষ আইন, ২০১০ (২০১০ সনের ১২ নং আইন);

(৪) “চেয়ারম্যান” অর্থ কর্তৃপক্ষের চেয়ারম্যান;

- (৫) “জরিপকারী” অর্থ বীমা আইন, ২০১০ এর ধারা ২(৩০) এ সংজ্ঞায়িত বীমা জরিপকারী;
- (৬) “ধারা” অর্থ বীমা আইন, ২০১০ এর কোনো ধারা;
- (৭) “ফরম” অর্থ এই বিধিমালার কোনো ফরম;
- (৮) “স্বীকৃত বিশ্ববিদ্যালয়” অর্থ আপাতত বলবৎ কোনো আইনের দ্বারা বা আইনের অধীন প্রতিষ্ঠিত কোনো বিশ্ববিদ্যালয় বা সরকার কর্তৃক স্বীকৃত কোনা বিদেশি বিশ্ববিদ্যালয়;
- (৯) “লাইসেন্স” অর্থ এই বিধিমালার অধীন প্রদত্ত বা ইস্যুকৃত লাইসেন্স; এবং
- (১০) “ফি” অর্থ বিধি ১৩ তে উল্লিখিত লাইসেন্স সংক্রান্ত বিভিন্ন ধরনের ফি।

(২) এই বিধিমালায় ব্যবহৃত যে সকল শব্দ বা অভিব্যক্তির সংজ্ঞা প্রদান করা হয় নাই, সেই সকল শব্দ বা অভিব্যক্তি এই আইন অথবা, ক্ষেত্রমত, কর্তৃপক্ষ আইনে যেই অর্থে ব্যবহৃত হইয়াছে সেই অর্থে প্রযোজ্য হইবে।

৩। বীমা জরিপকারীর উপ-শ্রেণি।—ধারা ১২৭ এর উপ-ধারা (৩) এর উদ্দেশ্য পূরণকল্পে, বীমা জরিপকারীকে নিম্নবর্ণিত উপ-শ্রেণিতে ভাগ করা যাইবে, যথা:—

- (ক) অগ্নি;
- (খ) নৌ (কার্গো);
- (গ) নৌ-হাল (জাহাজ কাঠামো);
- (ঘ) মোটর;
- (ঙ) ইঞ্জিনিয়ারিং;
- (চ) এভিয়েশন;
- (ছ) বিবিধ; এবং
- (জ) কর্তৃপক্ষ কর্তৃক, সময় সময়, সরকারি গেজেটে প্রকাশিত আদেশ দ্বারা, নির্দিষ্টকৃত অন্য কোন উপ-শ্রেণি।

৪। লাইসেন্সের আবেদন।—(১) এই বিধিমালার অধীন লাইসেন্স প্রাপ্তির জন্য, আবেদনকারী নিম্নবর্ণিত ফরমে কর্তৃপক্ষ বরাবর আবেদন করিতে পারিবে, যথা:—

- (ক) ব্যক্তির ক্ষেত্রে, ফরম-ক; এবং
- (খ) কোম্পানি বা ফার্মের ক্ষেত্রে, ফরম-খ।

(২) উপ-বিধি (১) এর অধীন আবেদনপত্র দাখিলের সময় আবেদনকারীকে নিম্নবর্ণিত তথ্য ও কাগজাদি সংযুক্ত করিতে হইবে, যথা:—

(ক) বিধি ৫ এর অধীন প্রযোজ্য শর্তপূরণ সংক্রান্ত তথ্য ও কাগজাদি

(খ) লাইসেন্স ফি পরিশোধ সংক্রান্ত রসিদ; এবং

(গ) বিধি ১২ এর অধীন বাস্তব প্রশিক্ষণ গ্রহণ সংক্রান্ত প্রত্যয়নপত্র।

(৩) উপ-বিধি (২) এ যাহা কিছুই থাকুক না কেন, কর্তৃপক্ষ কোনো আবেদনকারীর নিকট হইতে তদকর্তৃক নির্ধারিত কারিগরি যোগ্যতা সম্পর্কিত কোনো তথ্য ও বাস্তব প্রশিক্ষণ গ্রহণ সংক্রান্ত যে কোনো তথ্য চাহিতে পারিবে এবং উক্ত আবেদনকারী, কর্তৃপক্ষ কর্তৃক নির্ধারিত সময়ের মধ্যে চাহিত তথ্যাদি সরবরাহ করিবেন।

(৪) কর্তৃপক্ষ বা তদকর্তৃক অনুমোদিত কোনো কর্মকর্তা, প্রয়োজনীয়তার নিরীখে, আবেদনকারীর নিকট স্থায়ী বিবেচনায় অতিরিক্ত তথ্য বা আবেদনকারী কর্তৃক প্রদত্ত তথ্যের সঠিকতা নিরূপণের জন্য যে কোনো তথ্য চাহিতে পারিবেন এবং কর্তৃপক্ষ, প্রয়োজনে, আবেদনকারীকে বা তথ্য প্রমাণের জন্য আবশ্যিক এমন কোনো ব্যক্তিকে উপস্থিত হইবার জন্য আদেশ প্রদান করিতে পারিবে।

(৫) কর্তৃপক্ষ যদি মনে করে যে আবেদনকারী কর্তৃক প্রদত্ত তথ্য বা কাগজাদি সম্পূর্ণ বা সঠিক নহে এবং আবেদনকারী বরাবরে লাইসেন্স ইস্যু করা সম্ভব নহে, তাহা হইলে, আবেদনকারীকে সঠিক তথ্য এবং/বা কাগজাদি দাখিল সাপেক্ষে অনূর্ধ্ব ১ (এক) মাসের মধ্যে পুনরায় আবেদন করিবার জন্য লিখিতভাবে অবহিত করিবে।

৫। লাইসেন্স প্রদানের প্রয়োজনীয় শর্ত।—(১) বীমা জরিপকারী হিসাবে কার্য-সম্পাদনের লক্ষ্যে কোনো ব্যক্তিকে লাইসেন্স প্রদানের পূর্বে কর্তৃপক্ষকে নিম্নবর্ণিত বিষয়ে সন্তুষ্ট হইতে হইবে, যথা:—

(ক) আবেদনকারী—

(অ) কোনো স্বীকৃত দেশি বা বিদেশি বিশ্ববিদ্যালয় হইতে অন্যান্য স্নাতক বা সমমানের ডিগ্রিধারী;

(আ) জরিপকারী হিসাবে অন্যান্য ৫ (পাঁচ) বৎসরের কাজের বাস্তব অভিজ্ঞতাসম্পন্ন;

(ই) চাকুরিজীবী নহেন;

(ঈ) সরকারি বীমাকারী বা বীমা এজেন্ট বা ব্রোকার বা তাহাদের কর্মচারী নহেন;

(উ) কোন কর্পোরেশন, কোম্পানি, ফার্ম বা সংস্থার কর্মচারী নহেন; এবং

(ঊ) পূর্ণ সময়ের জন্য পরিচালক, অংশীদার বা উপদেষ্টা হিসাবে অন্য কোনো কোম্পানি, ফার্ম বা সংস্থার সহযোগী নহেন; এবং

(ঋ) আইনের ধারা ১২৭ এর উপধারা (৬) এর অধীন অযোগ্য নহেন।